

# Paonori Carasiaquë ya'huëpisopita ninshitërinso'

## Carasiaquë imapisopita quirica a'patërinso'

**1** <sup>1</sup>Ca Paonoco ninshitaranquëma', ni'co'. ¿Noyanquëma' canpitanta'? Noya canta' ya'huarahuë. Quisocristo acorinco nanamën a'china'huaso marë'. Co piyapi'sa' inahuara nohuanton a'parinacohuë' a'china'huaso marë'. Co inapita acorinacohuë'. Tata Yosë chachin acorinco. Ina nohuanton, Quisocristo nanopiantarin huachi. Nani nanopiantahuachina, ina chachin nanan quëtërinco a'china'huaso marë'. <sup>2</sup>Ya'lipicoi isëquë imaraisopitaro'coi chachin nanan a'patarainquëma'. Canpitanta' Carasia parti ya'huëramasopita imarama' ni'ton, ninshitaranquëma'. <sup>3</sup>Inaora nohuanton, Tata Yosë catahuainquëma'. Asanocancainquëma'. Sinioro Quisocristonta' inachachin catahuainquëma'. <sup>4</sup>Oshanënpoa' inquitinpoaso marë' Quisocristo chiminin. Inaora nohuanton, ya'huërëterinpoa'. Notohuaro' piyapi'sa' co noyahuë' yonquipi. Ama inapita pochin cancantacaso marëhuë' chiminaton, anoyacancantërinpoa'. Tata Yosë nohuanton, nicha'ërinpoa'. <sup>5</sup>“¡Ma noyacha Tata Yosëso paya!” itahua'. Ama onporonta' ina naniantahuasohuë'. Amen.

## Quisocristoíchin imacaso' ya'huërinso'

<sup>6</sup>Yosë ayonquirinquëma' imacamaso marë'. Quisocristo inaora nohuanton

nosoroatëinquëma', catahuarinquëma' ni'ton, imarama'. Imapiramahuë', a'naroáchin ina naniantatoma', nisha nanan yaimarama'. Ina yonquiato, pa'yanahuë. <sup>7</sup>Co a'na nanan, iyaro'sa', ya'huërinhuë' cha'ëcaso marë'. Quisocristoíchin anoyacancantërinpoa'. Ina imapatëhua', oshanënpoa' inquitarinpoa'. Inasáchin yonquipiramahuë', a'napita huëcatona', nisha nanan a'chintarinëinquëma'. Napoaton nisha nisha yonquirarama'. Yanonpintërinëinquëma'. “Co Quisocristoráchin yonquicaso' ya'huërinhuë',” itërinëinquëma'. <sup>8</sup>Quiyanta' nisha nanan a'chinai naporini, Yosë ana'inchitoncoihuë'. Anquëni tëranta' nisha nanan a'chinin naporini, Yosëri ana'inchitonhuë'. “Quisocristoíchin nicha'ërinpoa',” itëranquëma'. <sup>9</sup>Iráca inachachin sha'huitërainquëma'. Iporaso' naquëranchin sha'huitantërainquëma'. “Quisocristoíchin anoyacancantërinpoa',” ta'toma', imarama'. Inso tëranta' nisha nanan a'chintohuachinquëma', Yosëri chiniquën ana'inchin, tënhuë.

<sup>10</sup>Co piyapi'sa' noya nicainacoso marë' a'chinahuë'. Yosë noya nicainacoso marë' a'chinahuë. Piyapi'sa' pa'yatinacoso marë' na'con na'con yonquirahuë naporini, co Quisocristo natëitohuë'.

## Paono ya'nan imarinso'

<sup>11</sup>No'tëquën iyaro'sa' sha'huitërainquëma'. Iráca quëran huarë' co piyapi yonquirinso' a'chintëranquëmahuë'.

<sup>12</sup>Quisocristo chachin nanamën anitotë-rinco. Co a'na piyapi sha'huitërincohuë'. Co insonta' ina nanamën a'chintërincohuë'. Inaora chachin anitotërinco.

<sup>13</sup>Iráca naporahuëso' nani natantë-rama'. Co'huara Quisocristo imasha-tërapohuë', cotio nanan imarahuë'. Ina imato, Quisocristo imapisopita no'huirahuë'. Chiniquën aparisitërahuë'. Ata'huanta'huaso' yonqupirahuë'.

<sup>14</sup>Cotioro'sa' napopiso' chiniquën imato, inasáchin yonquirahuë'. Carë' napopiná-chin pi'ipitopiso' noya natëpirinahuë', caso' na'con na'con natërahuë'. Nani ma'sha shimashonëhuëpita a'chinpiso' yanatëpirahuë'. <sup>15-16</sup>Yosë nosoroatonco, nohuantërinco hui'nin imaca'huaso marë'. Co'huara nasichátërapohuë', yonquirinco nanamën a'china'huaso marë'. Inaora nohuanton, nosororinco ni'ton, hui'nin anohuitërinco nisha piyapi'sa' pënëna'huaso marë'. Ina marë' acohuachincora, co piyapi'sa' paaparahuë' a'chintinacoso marë'.

<sup>17</sup>Ca'tano'sa' Quirosarinquë ya'huë-pirinahuë', co inatohua' pa'nahuë' nonta'huaso marë'. Inapita'ton acopirinhüë', Yosë nani sha'huitërinco ni'ton, co inapita tëranta' natanconahuë'. Co hua'qui quëranhuë' Arapia parti paato, Quisocristo nanamën yonquiarahuë'. Ina quëran Tamascoquë paantarahuë'.

<sup>18</sup>Cara pi'ipi quëran Quirosarinquë pa'nahuë Pitro nohuita'huaso marë'. Cato simana pochin pëinënquë yacaparahuë'.

<sup>19</sup>Naporo' Santiaconta' nohuitërahuë'. Quisocristo iin inaso'. Inapitasáchin nontërahuë'. A'napita ca'tano'saso' co ni'nahuë'. <sup>20</sup>Yosë ni'sárinco, no'tëquën ninshitaranquëma'. Co nonpintaranquëmahuë'.

<sup>21</sup>Ina quëran Siria parti pa'nahuë a'chimpano. Sirisia partinta' pa'nahuë. <sup>22</sup>Cotia parti ya'huëpispitaso nipirinhüë' co

nohuichatërarinacohuë'. Inatohua' na'a Quisocristo imapisopita ya'huëpirinahuë', co nohuitërinacohuë'. <sup>23</sup>Topinan natantërinaco. "Íráca Paono aparisitërinpoa'. Yatëpapirinoahuë', iporasoinanta' imarin. Quisocristo nanamën a'chinarin huachi," topi, natantopi. <sup>24</sup>Ina natantahuatona', "¡Ma noyacha Tata Yosëso' ni'ton, Paononta' imarin paya!" topi.

### Quisoso ca'tano'sanënpitarë' ninontopiso'

**2** <sup>1</sup>Shonca catapini pi'ipi quëran naquëranchin Quirosarinquë paantarahuë. Pirnapi ca'taninco. Titonta' quëparai. <sup>2</sup>Yosë ayonquirinco paca'huaso' ni'ton, pa'nahuë imapisopita nonta'huaso marë'. Ansiano'sarachin niyontonpachinara, sha'huitërahuë. "Caso' nisha piyapi'sa' a'chintohuato, Quisocristoíchin imacaiso' ya'huërin, tënahüë. Iráca pënëntërinso' imacaiso' co a'chintërahuë'," itërahuë. "Co no'tëquën a'chinanhuë'," itërinaco naporini, topinan quëran a'chinchitëinquëmahuë', tënahüë yonquiato. Ansiano'saso nipirinhüë' "Noya a'chinan," itërinaco. <sup>3</sup>Titonta' nisha piyapi nipirinhüë', inatohua' quëparahuë. Co marca ya'huëtopirinhüë', ansiano'sari noya ni'pi. "Marca niacotëquë'," co itopihüë'. <sup>4</sup>A'naquën cotioro'saso nipirinhüë', "Quiyanta' imarai," taponaraihuë', co Quisocristoráchin imapihüë'. Iráca pënëntërinsona' imapi. Yasha'huirapitonaco, niyontonpiso pëiquë ya'conpi Quisocristo imatoi naporaisopita nicacaiso marë'. "Íráca pënëntërinsona' natëcaso' ya'huërin," ta'tona', yaanishacancantërinaco nisha nisha natëca'huaiso marë'. <sup>5</sup>Napotopirina-cohuë', co pi'pian tëranta' nohuantëraihüë'. "Quisocristoíchin anoyacancantërinpoa!,"

itërai. Canpitanta' no'tëquën yonquicamaso' nohuantërai. Napoaton nisha a'chintohuachinacoira, co manta' natëraihuë'.

<sup>6</sup>Ansiano hua'ano'saso' nipirihuë', co nisha sha'huitërinacohuë'. Chiniquën nanantopirinahuë', co të'huatërahuë'. Napopináchin Yosë ni'ninpoa'. <sup>7-8</sup>“No'tëquën a'chinan,” itërinaco. Pitrori a'chintohuachina, Yosë nohuanton, na'a cotioro'sa' Quisocristo imasapi. Carinta' a'chintohuato, Yosë nohuanton, na'a piyapi'sa', nisha nisha niponaraihuë', imasapi inahuanta'. Napoaton ansiano'santa' noya nontërinaco. “Yosëri Pitro acorin cotioro'sa' a'chintacaso marë'. Quëmaso nipirihuë' acorinquën nisha piyapi'sa' a'chintacaso marë',” itërinaco.

<sup>9</sup>Santiago, Pitro, Coansha, inapitaso' chini chiniquën nanantopi ni'ton, sha'huitërinacoi. “Yosë na'con catahuarinquën. Ina acorinquën nisha piyapi'sa' a'chintacaso marë',” ta'tona', sël'quërinaco. Pirnapinta' sël'quëpi. “Canpitaso' nisha piyapi'sa' a'chintoco'. Quiyaso nipirihuë' cotioro'sa' a'chintarai,” itohuachinacoira, “Noyahua’,” itërai. <sup>10</sup>“Ama sa'ahuaro'sa' naniantocosohuë'. Imapisopita a'chintoco' ma'sha quëta-caso',” itërinacoi. “Co'chi naniantaraihuë' paya. Nosororai quiyarinta',” itërahuë'.

### Paonori Pitro pënëninso'

<sup>11</sup>Ina quëran Pitro Antioquiaquë pa'pachina, Quisocristoíchin anoyacancantërinpoaso' nitotaponahuë', tëhuërin. Napoaton niyontonpiquë chachin pënë-nahuë. Ina sha'huichinquëma' nitotoco'. <sup>12</sup>Inaquë nisha piyapi'sa' ya'huëpi. A'naquën Quisocristo imapi. Inapitaso' co cotio piyapihuë' ni'ton, ya'ipi cosharo' ca'pi. Cotioro'santa' inaquë ya'huëpisopita Quisoso imapachinara,

co huachi cosharo' a'popihuë'. Napopináchin coshatopi. Pitronta' inapitarë' coshataton, co ma'sha a'porinhuë'. Ina quëran a'napita cotioro'sa' Quisocristo quëran canquipi. Santiago imarinso-pita inahuaso'. “Quiyanta' Quisocristo imarai,” taponaraihuë', iráca pënëntopiso' yonquiatona', ma'sha a'popi. Inapita huë'pachinara, Pitro co huachi nisha piyapi'sarë' coshatërinhuë'. Marca pa'yatopisopita të'huataton, nisha coshatërin. <sup>13</sup>Ya'huëhuano'santa' cotioro'sa' nipsisopita Pitro nicatona', nisha coshatopi. Pirnapinta' Pitrorë chachin nisha coshatërin. Quisocristo nanamën nitotaponaraihuë', co no'tëquën imapihuë'. <sup>14</sup>Ina ni'sahuato, ya'ipi piyapi ni'tërantapaiquë Pitro chiniquën pënë-nahuë. “Cotio piyapinquën niponahuë', Quisocristo imaton, iráca pënëntërinso' naniantëran. Nisha piyapi'sarë'quën coshataponahuë', iporaso' naquëran-chin ma'sha a'poantaran. Ina pochin nicaton, piyapi'sa' anishayonquiaran. ‘Co Quisocristoíchin nicha'ërinpoahuë' nimara. Iráca pënëntërinso'na' natëcaso' ya'huërin, ta'tona', nonanarinëquën. ¿Nisha piyapi'santa' cotioro'sa pochin yaatarantëran ti?

### Quisocristo natëhuatëhua', Yosë nicha'ërinpoaso'

<sup>15</sup>Canpoaso' hua'huatërehua quëran huarë' cotioro'sanpoa' ninëhua'. Co nisha piyapinpoahuë'. ‘Co oshahuano'sanpoahuë', nitërehua'. <sup>16</sup>Napopirëhuahuë', Moisésë pënëntërinso' natëhuatëhua', co ina marë' Yosë noya ni'sarinpohuë'. Quisocristoíchin imapatëhua', noya ni'sarinpoa'. Napoaton canpoanta' Quisocristo natërehua' oshanënpoa' inquitinpoaso marë'. Co inso tëranta' pënëntërinso' natërinso marë' Yosë'pa' pa'sarinhuë'. Quisocristoráchin nicha'ërinpoa'.

<sup>17</sup>‘Quisocristo nicha’ësarínpoa!’ ta’tëhua’, imarihuarahué!, iráca pënëntërinso’ imaantahuatëhua’, ¿Quisocristo napoahuaré! aoshahuanínpoa’ ti? Co onporonta’ ina pochín yonquicaso’ ya’huërinhué!. <sup>18</sup>Iráca pënëntërinso’ nani naniantërehua’. Naquëranchin ina yonquiantahuatëhua’, co Yosë natëarihuahué!. Quisocristoíchin yonquicaso’ ya’huërin. <sup>19</sup>Iráca canta’ pënëntërinso’ imapirahué!, co nanitërahué! no’tëquën natëca’huaso!. Co ina imato noya cancantërahué!. Oshahuanato, chimipi pochín cancantërahué. Napoaton iráca pënëntërinso’ naniantërahué Yosëíchin yonquica’huaso maré!. <sup>20</sup>Quisocristo corosëquë chiminín. Ina imato, canta’ corosëquë chiminahuëso pochín ninahué. Iráca yonquirahuëso’ naniantërahué. Napoaton co huachi oshahuanaca’huaso’ ya’huërinhué!. Iporaso’ Quisocristoíchin yonquirahué. Co huachi caora nohuanto ma’sha ninahué!. Quisocristo ya’coancantërinco ni’ton, catahuarinco noya nica’huaso!. ‘Nani tahuëri Yosë hui’nín chachín catahuarinco,’ ta’to, noya cancantërahué. Inaso’ pa’pi nosorinco. Nosoroatonco, ya’huërenamëhué chiminín. <sup>21</sup>Inaora nohuanton, Yosë nosoroatonpoa’, hui’nín a’paimarin chiminacaso maré!. Co ina naniantërahué!. Inasáchin imarahué ni’ton, Yosë noya ni’sarinco huachi. Iráca pënëntërinso’ natërehuaso maré! noya ni’nínpoa’ naporini, topinán quëran Quisocristo chimiintonhué!’ itërahué.

**Iráca nanan naniantatëhua’,  
nasha nananáchin imahua’**

**3** <sup>1</sup>Co no’tëquën iyaro’sa’ yonquiramahué!. ¿Inta’ ahua’yantatëinquëma’, anishacancantërinquëma’? ténahué yonquiato. “Quisocristo corosëquë patanantopi. Canpoa maré! chiminín,”

itërainquëma!. A’ninquëchin quënanëso pochachín sha’huitohuatëinquëmara, natanama!. “Ina pochín chiminaton, oshanënpoa’ inquitërinpoa!” ta’toma!, Quisocristo imarama!. <sup>2</sup>Isoíchin yanitotërahué. ¿Ma’ta’ imarama’ ni’ton Ispirito Santo ya’coancantërinquëma’? Iráca pënëntërinso’ natëhuatama!, ¿Ispirito Santo ya’coancantërinquëma’ ti? ¡Co’ta, Quisocristo nanamën natanatoma’ natëhuatama!, ya’coancantërinquëma’! “No’tëquën nontërinpoa!” ta’toma!, natërama!. Ina imapatama!, Ispirito Santo ya’coancantatëinquëma!, na’con catahuarinquëma!. <sup>3</sup>¿Onpoatomata’ iporaso’ co huachi no’tëquën yonquiramahué’? Naquëranchin iráca pënëntopiso’ yanatëantarama!. Ya’nan imapoma!, co canpitaora nanitëramahué! Yosë huëntonëinquë ya’conacamaso!. Ispirito Santo aya’coninquëma!. Ipora huanta’ co canpitaora nanitaramahué! noya noya imacamaso!. <sup>4</sup>Imaramaso maré! Ispirito Santo na’con catahuapirinquëmahué!. Quisocristo naniantohuatama!, topinán quëran catahuarinquëma!. Napoaponahué!, co Quisocristo naniantaramahué!, topirahué!. <sup>5</sup>“Quisocristoíchin anoyacancantërinco,” topatama!, Ispirito Santo ya’coancantërinquëma!. Inapotohuachinquëma!, achinicananinquëma!. Catahuarinquëma’ ni’ton, nani ma’sha nanitaparama!. Co iráca pënëntërinso’ natëramaso maré! catahuarinquëmahué!.

<sup>6</sup>Isonta’ yonquico!: iráca Apraan Yosë natërin. “No’tëquën nontërinco. Sacai’ nininsonta’ nanitaparin,” topachina, Yosëri noya ni’nín. <sup>7</sup>Iporaso’ canpoanta!: “Yosë no’tëquën nontërinpoa’ ni’ton, imasarahué,” topatëhua!, Apraan pochín cancantarihua!. Ina pochín cancantohuatëhua!, Yosë noya ni’sarinpoa!. Inanta’ iyaro’sa’ nitotoco!

<sup>8</sup>Co cotioro'saráchin Yosëri nohuan-tërinhuë'. Nisha piyapi'santa' imapachina', noya ni'sarin. Noya nicaton, co oshanëna marë' ana'intarinhuë'. Iráca iso noya nanan ninoton, Apraan itapon: "Nisha nisha piyapi'santa' quëma pochin cancantohuachina', na'con catahuaarahüë," itërin Yosëri. Quiricanën quëran naporin. <sup>9</sup>Apraan Yosëri sha'huitërinso' topinan natëcharinso marë' Yosëri na'con catahuarin. Inapochachin canpoanta' Quisocristo nanamën topinan natëcharëhuaso marë' catahuarinpoa'.

<sup>10</sup>Moisësë iráca pënëntërinso' yaimapatama', ana'intinquëmaso' ya'huërin. Co ya'ipi natëramahuë' ni'ton, Yosë ana'intarinquëma'. Iráca quiricanën quëran naporin: "Co ya'ipimiáchin natëhuatamacohüë', chiníquën ana'intaranquëma'. Parisitopiquë a'paranquëma'," tënin. <sup>11</sup>"Pënëntërinso' natëto cha'ësarahüë," co ta'caso' ya'huërinhuë'. Ina pochin cancantohuatëhua', co Yosë noya ni'sarinpoahuë'. Quiricanën quëran no'tëquën sha'huitërinpoa': "Cancanënpoa quëran huarë' natëtohuatëhua', Yosë noya ni'sarinpoa ni'ton, noya nanopimiatarihua'," tënin quiricanënquë. <sup>12</sup>Cato' nanan ya'huërin. Co cato chachin imacaso' ya'huërinhuë'. Iráca pënëntërinso' natëhuachina', inasáchin natëcaso' ya'huërin. Moisësë sha'huitërinpoa': "No'tëquën natëcaso' ya'huërin. No'tëquën natëhuatëhua', noya nanopimiatarihua'," tënin. Ina nanan imapatama', co Quisocristo nanamën imaramahuë'.

<sup>13</sup>Co nanitërhüahuë' no'tëquën natëcaso' ni'ton, ana'intinpoaso' ya'huërin. Quisocristoso nipurinhuë' nicha'ërinpoa'. Canpoa' ya'huërenamënpoa' chiminin. Ina, Yosëri ana'intërin. Quiricanën quëran naporin: "Piyapi pa'pi co

noyahuë' nipachina, naraqüë achinpirahuatë', chiníquën ana'intëré'. Nani Yosëri a'porin," tënin quiricanënquë. Canpoaso' ana'intinpoaso' ya'huëpirinhuë', naraqüë chachin Quisocristo apatanantohuachinara, oshanënpoa marë' parisitërin. Inaquë parisitaton, nicha'ërinpoa'. <sup>14</sup>"Yosë no'tëquën nontërinco," tënin Apraan. Ina tëninso marë' Yosëri noya ni'nin. Nisha piyapiro'sarinta' imacaiso marë' Quisocristo chiminin. Ina natëhuachinara, Yosëri noya ni'nin. Ya'ipinpoa' Quisocristo imapatëhua', Ispirito Santo ya'coancantarinpoa'. Iráca Yosë sha'huirinso pochachin ya'coancantarinpoa'.

#### Yosë sha'huirinso'

<sup>15</sup>Ni'cochi iyaro'sa'. Iso pochin sha'huichinquëma' yonquicamaso marë'. Ma'sha mapatëra, quirica quëtërinënpa'. Quëtohuachinënpora, hua'ani nininën acorahuaton, hui'sharin. Ina quëran co insonta' nanitërinhuë' canpiacaso'. Co aquëtë' ninshitacaso' ya'huërinhuë'. Naporahuaton, co tapicaso' ya'huërinhuë'. Ya'nana ninshitërinso'ráchin ya'huëmiatarin. <sup>16</sup>Inapochachin iráca Yosëri nontaton, Apraan sha'huitërin: "Caora nohuanto, nóya catahuanquën. Quëma shiparionta' catahuaarahüë ya'ipi piyapi'sa' anoyacancantacaso marë'," itërin. A'na'fchin shiin yonquiaton, naporin. Quisocristo ninoton, naporitërin. <sup>17</sup>Iráca Apraanë' anoyataton, itapon: "A'na tahuëri quëma shiparin ya'huëhuachin, ya'ipi piyapi'sa' anoyacancantarin. Caora nohuanto, nicha'ësarahüë. No'tëquën nontaranquën. Co onporonta' naniantarahuë'," itërin Yosëri. Ina quëran catapini pasa cara shonca pi'ipi na'huëhuachina, cotioro'sa' pënënin nani ma'sha natëcaiso marë'. Pënënpurinhüë', Apraanë'

iráca anoyatërinso' co naniantërinhuë'. Yosëri nani sha'huitohuachina, co onporonta' nonpininhuë'. <sup>18</sup>Íráca Yosëri sha'huitërin. "Caora nohuanto, piyapi'sa' nicha'ësarahuë," itërin. Íráca pënëntërinso' natëtë' cha'ëcaso' ya'huërin naporini, co inaora nohuanton Yosë nicha'ëitonpoahuë'.

<sup>19</sup>¿Ma'marëta' nipachin pënëntërinso' nanan ya'huërin? Co topinan quëran cotioro'sa' pënëninhuë'. Oshahuanëhuaso' anitotinpooaso marë' pënënin. Quisocristo nasitaquë huarë' pënëntërinsoachin ya'huërin imacaiso'. Quisocristo nasitohuachina, iráca Apraan sha'huitërinso chachin o'marin. Yosë pënëntohuachina, anquëniro'sa' a'paimarin Moisésë sha'huitacaso marë'. Ina quëran Moisésëri piyapi'sa' sha'huitërin. <sup>20</sup>Nipirinhuë', Apraan nontohuachina, co anquëni a'paimarinhuë'. Co piyapi tëranta' a'parinhuë' sha'huitacaso marë'. Inaora chachin no'tëquën sha'huitërin.

#### Maistro pochin nininso'

<sup>21</sup>Ina pochin ni'quëhuarë' Moisésë pënëntërin ni'ton, ¿Yosëri Apraan sha'huitërinso' tapirin ti? Co naporinhuë'. Pënëntërinso' noya noya nicaton, anoyacantërinpoa' naporini, ina natërehuaso marë' Yosë noya ni'itonpoahuë'. <sup>22</sup>Nipirinhuë', co insonta' nanitërinhuë' no'tëquën natëcaso'. Ya'ipinpoa' oshahuanëhua'. Ina marë' ana'intinpooaso' ya'huërin, tënin Yosë quiricanën quëran. Napoaton Quisocristoráchin nanitaparín anoyacantinpooaso'. Inasáchin imapatëhua', Yosë noya ni'sarinpooa'.

<sup>23</sup>Co'huara Quisocristo imacaso' tahuëri naniyatërasohuë' Moisésë pënëntërinso' hua'anëntatë pochin nitërinpoa' ama aquëtë' oshahuanacaso

marëhuë'. Oncorapirinpoaso pochin nitërinpoa'. Quisocristo nasitaquë huarë' pënëntërinsoachin ya'huërin ama Yosë naniantacaso marëhuë'. <sup>24</sup>Ni'cochi. Hua'huaro'sa' co yonquihuë' ni'ton, na'con pënënacaso' ya'huërin. Inapochachin iráca Moisésë na'con pënëninpoa'. Maistro pochin pënëninpoa' oshahuanëhuaso' ayonquinpooaso marë'. Co pënëntërinso' natëcaso' nanitërehuahuë' ni'ton, Quisocristo huachi yonquiarëhua'. Ina imapatëhua', anoyacantarinpoa'. <sup>25</sup>Iporaso' nani Quisocristo o'marin ni'ton, co huachi maistro pochin nininso' nohuantarihuahuë'.

<sup>26</sup>Iporaso' Quisocristo imapatëhua', hui'ninpita pochin Yosë ni'ninpoa'. <sup>27</sup>Ya'ipinpoa' Quisocristo natëhuatëhua', huëntonënuquë chachin aya'coninpoa'. Ya'conpatëhuara, "Quisocristoíchin imasarahuë huachi," ta'tëhua', aporihuanëhua'. Nasha a'morëso pochin ninëhua' ni'ton, Quisocristo pochin yonquiarihua'. <sup>28</sup>Yosëso' co nisha nisha yonquirinpoahuë'. A'naquënpooa' cotio piyapinpooa', a'naquëonta' nisha piyapi'sa'. A'naquëonta' patrono'sa', a'naquënso' piyapinënpita. A'naquën sanapi'sa', a'naquënpooa' quëmapinpooa' nipirëhuahuë', ya'ipinpoa' Quisocristo imapatëhua', a'na huëntoínchin pochin ninëhua'. <sup>29</sup>Quisocristo imapatëhua', Apraan shinpitanpoa' ninëhua' canpoanta'. Apraan sha'huitërinso pochachin na'con catahuarinpooa'.

**4** <sup>1</sup>Ni'cochi. Ma'huan chiminpa-china, ya'ipi ma'shanënpita, coriqui, inapita ayananpirin. Hui'nin mashotohuachina, inari ya'huëretërin. Hua'huataponso nipirinhuë', co a'naroáchin maninhuë'. Inaora ma'shanënpita nipirinhuë', piyapinën pochin nicaton, co a'naroáchin hua'anëntërinhuë'.

<sup>2</sup>Hui'napitaquë huarë' a'napitari a'pairin. Hua'huasha ni'ton, natëcaso' ya'huërin. Ina quëran hui'napitohuachina, ya'ipi hua'anëntarin. Pa'pin sha'huirinso tahuëri chachin nanihuachin, hua'anëntarin. <sup>3</sup>Inapochachin canpoanta' co'huara Quisocriso nanamën nitochatërarihuahuë', hua'huaro'sa pochin yonquirëhua'. Nani ma'sha natëcaso' yonquiconëhua'. Ma'sha a'pocaso', ma'sha nicacaso', inapita sha'huitërinënpoa'. Inasáchin yonquipirëhuahuë'. <sup>4</sup>Ina quëran tahuërinën nanihuachina, Yosëri hui'nin a'paimarin. Sanapi quëran nasitaton, piyapi chachin ninin. Cotio quëmapi ni'ton, iráca pënëntërinso' natëcaso' ya'huërin. <sup>5</sup>Iráca pënëntërinso' natëtoi, piyapinën pochin nipiraihuë', Quisocriso nicha'ëinpoaso marë' o'marin. Ina imarëhua' ni'ton, iporaso' hui'ninpita pochin Yosë ni'ninpoa'. <sup>6</sup>Hui'nin pochachin nicatonpoa', Ispirito Santo aya'coancantërinpoa'. Ina quëran Yosë nontohuatëhua', Ispirito Santo nohuanton, "Tata" itërehua'. <sup>7</sup>Napoaton co huachi pënëntërinso' hua'anëntërinpoahuë'. Hui'ninpita pochin Yosë ni'ninpoa' ni'ton, na'con catahuarinpoa'. Inaora nohuanton, ya'ipi sha'huitërinpoaso' acotaripoa'.

**Iráca pënëntopiso' co  
natëcaso' ya'huërinhuë'**

<sup>8</sup>Iráca co Yosë nohuitëramahuë'. Nisha nisha ma'sha, mamanshi, inapita t'ëhuatatomá', mosharama', co inapita yonquicasohuë' nipirinhüë'. <sup>9</sup>Iporaso' Yosë nohuitërama'. Inanta' hui'ninpita pochin nicatëinquëma', noya nohuitërinquëma'. Nani nicha'ëpirinquëmahüë', ¿ma'marëcha naquë-ranchin iráca pënëntërinso', a'napita piyapi'sa' natëtopiso', inapita natëtoma',

të'huachinachin cancantantarama'? ténahuë. Inapita natëapomarahüë', co ina marë' noyápiachin cancantëramahuë'. <sup>10</sup>Cotioro'sa pochin sahuato tahuëri chinotërama', yoquia'huarai tahuëri'santa', chinotantarama'. Nani pi'ipi nisha nisha niyontonpiso tahuëri'sa' na'huërama'. "Ina marë' Yosë noya ni'ninpoa'," topiramahuë', co ina marë' noya ni'ninquëmahüë'. <sup>11</sup>No'tëquën iyaro'sa' a'chintopiranquëmahüë', nianiantërama' nimara, ténahuë. "Topinan quëran a'chintërahuë nimara," ta'to sëtërahuë.

<sup>12</sup>Canta' iráca ya'ipi pënëntërinso' natëpirahuë', Quisocriso imaca'huaso marë' co huachi ina yonquirahuë'. Ca pochin cancantatoma', canpitanta', iyaro'sa', "Co iráca pënëntërinso' nicha'ë-sarinpoahuë'," ta'toma', Quisocriso'chín imaco huachi. Iráca nicapëinquëma' pa'patëra, co no'huiramacohüë', noya nontëramaco. <sup>13</sup>Ya'nán a'chintapëinquëma', caniorahuë. Canioto, hua'qui' yacapatëinquëma', a'chintëranquëma'. Ina nitotërama'. <sup>14</sup>Chiniquën caniopirahuë', co nocanamacohüë'. Noya natanamaco. "Anquëni pochin Yosë nanamën a'chintërancoi," itëramaco. Quisocriso noninso pochachin natanamaco. <sup>15</sup>A'chintohuatëinquëmara, pa'yatërama'. Na'con nosororamaco. Nanitërama' naporini, ya'pirama chachin quëchitomacohüë'. ¿Onpoatomata' iporaso nisha yonquirama'? <sup>16</sup>No'tëquën pënënanquëma' ni'ton, ¿no'huiramaco ti?

<sup>17</sup>Nisha a'china'piro'saso canpitataquë paatona' noyásha nontopirinëinquëmahüë', co t'ëhuëinchachin yacatahuarinëinquëmahüë'. Yaocoiarinëinquëma' inapita pa'yatamaso marë'. "Ama Paono natëcosohüë'," itërinëinquëma'. <sup>18</sup>Noyasha yonquiatona', a'chinpachina', a'china'pi

pa'yatacaso' ya'huërin. Nipirinhüë', co noyahuë' yonquiatona', a'chinpachina', co pa'yatacaso' ya'huërinhuë'. Canpitataquë ya'huasoco, nóya nontëramaco. Iporanta' co ya'huëpirahuë', noya yonquirapico, topirahuë'. <sup>19</sup>Na'con iyaro'sa' nosororanguëma'. Hui'nahuëpita pochachin ni'nanquëma'. Ni'co'. Sanapi yahuaihuachina, chiniquën parisitërin. Inapochachin canta' na'con yonquiatënguëma', chiniquën parisitarëso pochin cancantërahuë. Canpitanta' Quisocriso pochachin cancantacamaso' na'con nohuantërahuë. Quisocrisotráchin imapatama', oshaquëran ina pochachin cancantarama'. Ina marë' na'con yonquiáranquëma'. <sup>20</sup>Ma'cha inatohua' acolincoya, topitërarahuë. ¡Inaquë ya'huërahuë naporini, ninontërehua' noya noya niitonhuë! Aquë ya'huërama' ni'ton, “¿Ma'ta' onpochi anoyata'huaso' marë' nicaya?” tënahüë yonquiato.

**Acara, Sara inapita  
pochin nipiso'**

<sup>21</sup>Natanco iyaro'sa' Moisésë pënëntërinso' yanatëramasopita. ¿Co ya'ipi Moisésë ninshitërinso' natanamahuë' ti? <sup>22</sup>Apraan cato' hui'nin ya'huëtërin. A'naso' cosonanën hua'huin. A'naso nipirinhüë' sa'in chachin hua'huin, tënin. <sup>23</sup>Cosonanënso' a'napita sanapi'sa' pochin hua'huanin. Sa'in chachinso nipirinhüë' Yosë nohuanton, hua'huanin. Co'huara hua'huayantëraponhuë', Yosëri itërin: “Ca nohuantonëhuëquë hua'huanaran,” itërin. Yosëri catahuarin ni'ton, hua'huanin. <sup>24-25</sup>Iso cato' sanapi'sa' yonquiatoma', nitotoco'. Cato' sanapi'sa' ya'huërin. Inapochachin cato' anoyatërinso ya'huërin. A'naso' iráca pënëntërinso', itopi. A'naso' nipirinhüë', Quisocriso quëran anoyatërinpoaso'.

Iráca pënëntërinso' cosona pochin ninin, Acara itopiso'. Iráca cotioro'sa' Arapia parti pa'topi. Ina parti pa'taso', Moisésë pënëntërin. Sinai motopiquë cancompachinara, pënëntërin nani ma'sha natëcaiso'. “Co no'tëquën natëhuatëhuahuë', Yosë ana'intarinpoa',” ta'tona', të'huatopi. Ipora huanta' cotioro'saso' Quirosarinquë ya'huatona', pënëntërinso' nanan imasapi. “Ana'intohuachinpoa',” ta'tona', të'huarë'na' ya'huapi. <sup>26</sup>Apraan sa'inso nipirinhüë' co ina pochinhüë'. So'ini noya noya ni'nin. Co hua'anën pochin camairinhüë'. Inapochachin inápaquë nasha Quirosarin ya'huërin. Inatohua' co nisha nisha natëcaso' ya'huërinhuë'. Quisocriso imapatëhua', Sara hua'huin pochin ninëhua'. <sup>27</sup>Iráca Yosë quiricanënuquë ninshitaton, naporin:

“Co hua'huana'pinquënhüë'  
niponahuë', nóya cancantë-  
quë'.

Co hua'huanaton iquitapona-  
huë', capa cancantëquë'.

A'na'ton so'yaton, hua'huanin.

Quëmaso nipirinhüë', na'con  
na'con amiparinpita ya'huë-  
tarinquën. Ina marë' capa  
cancantëquë',” itërin.

<sup>28</sup>Apraan hui'nin chachin Isaco itopiso'. Yosë nohuanton, ya'huëtërin. “No'tëquën Yosë nontërinco,” topachina, ina nohuanton, Isaco nasitërin. Canpoanta' Quisocriso imapatëhua', Yosë nohuanton, huëntonënuquë ya'conarihua'. Hui'ninpita pochin ni'ninpoa'. <sup>29</sup>Apraan hui'ninpitaso' co noyahuë' nini'tona', ya'huëpi. Ispirito Santo nohuanton, Isaco nasitërin. Cosona' hua'huinso nipirinhüë', apiraton Isaco aparisitërin. Inapochachin ipora huanta' iráca pënëntërinso' nanan imapisopita aparisitërinënpoa'.



<sup>30</sup>Cosona' hua'huinso nipirihuë', co ya'huëmiatërinhuë'. Ina'ton nasitaponahuë', Yosë co nohuantërinhuë' pa'pin ma'shanënpita hua'anëntacaso'. Apraan nontaton, itapon: "Isaco ya'ipi hua'anëntapon. Napoaton cosonaso', hua'huinë chachin a'paquë' pa'ina'," ténin. <sup>31</sup>Napoaton iyaro'sa' Quisocristo nanamën imapatëhua', co pënëntërinso' nanan imacaso' ya'huërinhuë'. Yosëso' co patron pochin piyapitërinpoahuë'. Huëntonënuë' chachin aya'coninpoa' ni'ton, hui'nin pochachin ni'ninpoa'.

### Quisocristo ocoirinpoaso'

**5** <sup>1</sup>Quisocristo nicha'ërinpoa' inasáchin yonquiatëhua' noya cancantacaso marë'. Ina imapatëhua', catahuarinpoa' noya nicacaso'. Napoaton ama naquëranchin iráca pënëntërinso' imahuasohuë'. Quisocristoráchin yonquia'ahua'.

<sup>2</sup>Ca Paonoco no'tëquën sha'huitëranquëma'. Marca niacotohuatama', co Quisocristoíchin yonquiamahuë'. Ina quëran co anoyacancantarinquëmahuë'. <sup>3</sup>Naquëranchin sha'huitantarquëma'. Marca niacotohuatama', ya'ipi cotio pënëntërinso' natëcaso' ya'huërin. <sup>4</sup>"No'tëquën natëhuatëhua', Yosë noya ni'sarinpoa'," topatama', co Quisocristo imaramahuë'. Yosë inaora nohuanton, nosoropirinquëmahuë', Quisocristo naniantohuatama', co huachi catahuarinquëmahuë'. <sup>5</sup>Nipirihuë', ina imapatëhua', Ispirito Santo catahuarinpoa'. "Quisocristoíchin anoyacancantërinpoa'," topatëhua', Yosë noya ni'sarinpoa', tënëhua'. Oshanënpoa' inquitatonpoa', tēhuënachchin noyápiachin cancan quëtarinpoa'. Ina ninarëhua'. <sup>6</sup>Quisocristo imapatëhua', co marca yonquiarihuahuë'. A'naquënso' nani niacotopi. A'naquënso nipirihuë'

co niacotopihuë'. Co ina yonquicaso' ya'huërinhuë'. Cancanënpoa quëran huarë' imacaso' ya'huërin. "Quisocristo catahuarinpoa'. Co nonpintarinpoahuë'," ta'tëhua', ya'ipi cancanënpoa quëran natëahua'. Ina natëhuatëhua', catahuarinpoa' nóya ninosorocaso'. Ina pochin cancantohuatëhua', Yosë noya ni'sarinpoa'.

<sup>7</sup>Canpitaso noya imasapiramahuë', ¿inta nonpintatënuëma', nisha ayonquirinquëma'? tēnahüë. <sup>8</sup>Co ina pochin Yosë a'chintërinpoahuë'. Huëntonënuë' aya'coninpoa' ni'ton, cancanënpoaquë nontarinpoa'. No'tëquën yonquicaso' nohuantërin. <sup>9</sup>Ni'co' iyaro'sa'. Pan nipatëra, pi'pian ahuëpocatërinso' acotohuachinara, ya'ipi sël'cotërin. Inapochachin pi'pian tēranta' nonpin nanan yonquihuatama', co hua'quiya quëranhuë' ya'ipinquëma' nitapicananarama'. <sup>10</sup>Caso nipirihuë' natëranquëma'. No'tëquën yonquiamama', tēnahüë. Sinioro catahuarinquëma' ama nisha nisha yonquicamaso marëhuë'. Nipirihuë', inso tēranta' nisha a'chintohuachinquëma', Yosëri anal'intarin. Chiniquënanantopirionta', nonpintohuachinquëma', Yosëri anal'intarin.

<sup>11</sup>A'naquën nonpinapirinaco. —Paononta' quiya pochin a'chinin. "Marca niacotoco'. Co iráca pënëntërinso' natëhuatamahuë', co Yosë noya ni'sarinquëmahuë'," ténin Paononta', toconpi. Co napopirahuë', nonpinapirinaco. Ina pochin a'chinahuë' naporini, co cotioro'sa' no'huiitonacohuë'. "Quisocristo corosëquë chiminin. Inasáchin imapatëhua', anoyacancantarinpoa'," itërahüëso marë' ipora huanta' aparisitarinaco. <sup>12</sup>Marca niacotacaiso' na'con na'con yonquipi ni'quëhuarë', ya'ipi niyashitëtochinapi naporini, noya noya niitonahuë'.

<sup>13</sup>Ina pochin, iyaro'sa', nontaranquéma'. Canpitaso' Quisocristo nohuantërinquéma'. Nicha'ërinquéma' ama huachi të'huarè'quéma' ya'huëcamaso marëhué'. Co huachi ya'ipi iráca pënëntërinso' imacaso' ya'huëpirinhué', co Yosë nohuantërinhué' oshahuana-camaso'. Quisocristo imapatama', co noyahué' yonquiramaso' naniantacaso' ya'huërin. Ninosoroatoma', nicatahuaco' noya cancantacamaso marë'. A'napita na'con na'con yonquico'. <sup>14</sup>Iráca Yosë pënëntohuachina, ninosorocaso' na'con na'con nohuantërin. "Quëmaora ninosororanso pochachin a'napitanta' nosoroco'," tënin. <sup>15</sup>Nino'huihuatama', pa'pi co noyahué' nisarama'. Tanan ni'niro'sa' niquëtëpiso pochin cancantarama'. Nipinocasonta' co noyahué'. Ina pochin nipatama', ni'cona ya'ipin-quéma' nitapicancantama'.

#### **Ispirito Santo catahuarinpoaso'**

<sup>16</sup>Ispirito Santo natëco' catahuainquéma', tënahuë. Ina catahuahuachinquéma', co noyahué' yonquiramaso' naniantarama'. Inapita naniantatoma', nóya nisarama'. <sup>17</sup>Ispirito Santo noyasáchin ayonquiinpoaso' nohuantopirinhué', ipora huanta' co noyahué' yonquirëhua'. Ispirito Santoso nipirinhué' pënëninpoa' ama ina pochin cancantacaso marëhué'. Co noyahué' yonquihuatëhua', co nani-tërëhuahué' Ispirito Santo natëcaso'. Cato' cancan pochin ya'huëtërinpoa'. Itohuara capini nipatëtatë pochin nipi. Noya cancantacaso' nohuantopirëhuahué', canpoara co nani-tërëhuahué' noya nicacaso'. <sup>18</sup>Cancanënpoaquë Ispirito Santo nontërinpoa' ma'sona noya nicacaso'. Ina natëhuatëhua', co huachi iráca pënëntërinso' camairinpoahué'. Ispirito Santo nohuantërinso chachin yonquiarihua'.

<sup>19</sup>Piyapi'sa' inahuara co nanitopihué' Yosëichin yonquicaiso'. Co noyahué' yonquipisopita nitotërëhua'. Co noyahué' yonquihuachinara, co noyahué' nipi. Yamonshihuanpi, taparo' nonpi, sanapi sè'huachinachin cancantopi. <sup>20</sup>Co noyahué' yonquihuachinara, mamanshi moshapi, pënotopi, co nanan anoyatopihué', co napopianachin yonquipihué'. A'pitatona', a'naroáchin no'huitopi, nipinopi. A'na huënton a'na huënton co noyahué' ninicatona' ya'huëpi. Nisha nisha yonquiatona', ya'huëpi. <sup>21</sup>Co noyahué' yonquihua-chinara, a'napita ma'shanënpita noyapatona', no'huipi. No'pipi, pitaro'saquë ca'miatopi, o'omiatopi, a'naratipita nipi. Iráca pënënanquéma'. Iporanta' pënëantaranguéma'. Inapohuatama', co Yosë hua'anëntërinquë ya'conaramahué'. Ina pochin nipisopita co Yosë'pa' pantarapihué'.

<sup>22</sup>Nipirinhué', Ispirito Santo natëhuatëhua', catahuarinpoa' ninosorocaso'. Catahuahuachinpoa', Yosë nohuitatëhua', capa cantarihua'. "Yosë noya ni'sarincó," ta'tëhua', sano cantarihua' ni'ton, noya ninicatëhua' ya'huarihua'. Piyapi'sa' no'huipirinpoahuënta', co yano'huirihuahué'. Ma'sha onpohuatëhuanta', ahuantarihua'. Nosoroatëhua', nóya nontarihua'. Ispirito Santo catahuahuachinpoa', noya nicarihua'. No'tëquën nontarihua'; co pi'pisha tëranta' nonpintarihuahué'. <sup>23</sup>Ispirito Santo natëhuatëhua': "Caso' noya noyaco," co tëcarihuahué'. Sano piyapi nicarihua'. Co noyahué' nicacaso' yonquipirëhuahué', ina catahuarinpoa' naniantacaso'. Inapohuatëhua', Yosë noya ni'sarinpoa'. Co pënëinënpoaso' ya'huaponhué'. <sup>24</sup>Quisocristo corosëquë chiminaton, oshanënpoa' inquitërinpoa'. Napoaton canpoanta'

ina imapatèhua', co noyahuè' yonquirè-huasopita corosèquè patanantatè pochin nitatèhua', naniantacaso' ya'huèrin. Co huachi nohuantarihuahuè' sopai pochin cancantacaso'. <sup>25</sup>Ispirito Santo ya'coancantatonpoa', catahuarinpoa' noya nicacaso' ni'quèhuarè', ma'sona tèranta' sha'huitohuachinpoa', noya natèhua'.

<sup>26</sup>Ama noya ninèhuaso marè' a'napita nocahuansohuè'. Ninocanpatèhua', a'naroáchin nino'huiarihua'. Itohuara capini ninoyapatèhua', nino'huiarihua'. Ama ina pochin cancantahuasohuè'.

#### Nicatahuacaso' ya'huèrinso'

**6** <sup>1</sup>Ispirito Santo natètoma' noya cancantohuatama', a'napitanta' catahuaco' ina pochin cancanchina'. A'naso' co noyahuè' nipachin, ama no'huicosohuè'. Sanoanan quèran pènénatoma', catahuaco' co noyahuè' yonquirinsopita nanianchin. Ni'cona canpitanta' sopai minsèchinquèma'. <sup>2</sup>Ya'lipinpoa' a'na tahuèri ma'sha onporèhua'. A'na tahuèrinta' sopai yanonpintèrinpoa' co noyahuè' nicacaso marè'. Napoaton nicatahuahua' noya yonquicaso marè'. Panca pè'pèto nicatahuarèso pochin catahuahua'. Inapohuatèhua', Quisocriso natèarihua'. “Ninosoroco,” itèrinpoa'.

<sup>3</sup>“Caso' noya piyapico,” topatan, quèmaora ninonpintaran, co no'tè-quèn yonquiranhuè'. Co insonta' Yosè pochachin cancantèrinhuè'. Co Yosè catahuarinpoahuè' naporini, co manta' noya niitèrihuahuè'. <sup>4</sup>Ama a'napita napopiso' nicatoma', nitantiacosohuè'. Quèmaora naporanso yonquiaton, nitantiaquè'. Noya cancantohuatan, Yosè noya ni'sarinquèn. Ina quèran “Yosè noya ni'sarincó,” ta'ton, capa cancantaran. <sup>5</sup>A'naya a'nayanpoa'

Yosè acorinpoa' ma'sona nicacaso'. Canpoara pè'pètonènpoa' quèparèso pochin niahua'. A'na tahuèri sacai' nipi-rinhuè' ahuantatèhua', imamiatahua'.

<sup>6</sup>A'naquèn paatona', nani tahuèri Yosè nanamèn a'chinápi. A'chinto-huachinquèma', ma'sha quètoco' ama pahuanchinasohuè'.

<sup>7</sup>Ni'cona sopai nonpintoquinquèma'. Co Yosè tèhuacaso' ya'huèrinhuè'. Co insoari tèranta' nanitèrinhuè' Yosè nonpintacaso'. No'tèquèn yonquico'. Ma'sha sha'patèra, inachachin nitèrin. Co nisha nitèrinhuè'. <sup>8</sup>Inapochachin co noyahuè' yonquirápatèhua', co noyahuè' nisarèhua'. Ina marè' ana'intinpoaso' ya'huèrin. Nipirinhuè', Ispirito Santo natèhuatèhua', nani tahuèri catahuarinpoa' noya cancantacaso marè'. Ina quèran Yosé'pa' noya nanopicontarihua'. <sup>9</sup>Ama Yosè naniantatèhuahuè', noya niahua'. Noya nicacaso' ama amiahua-sohuè'. Chiníquèn cancantohuatèhua', Yosè noya ni'sarinpoa'. Ina marè' tahuèri nanihuachin, acanaarinpoa'. <sup>10</sup>Napoaton ya'ipi piyapi'sa' nosoroa-hua'. Nanitohuatèhua', catahuahua'. Quisocriso imarèhuasopita capini na'con na'con nicatahuahua'.

#### Piquèran huarè' pènèntèrinso'

<sup>11</sup>Ca Paonoco apira pi'pian tèranta' caora imirahuè quèran ninshitaran-quèma'. Panca ninshiquè ninshitaran-quèma'. <sup>12</sup>A'naquèn ipora huanta' marca yaacotarínèinquèma'. A'napita cotioro'sari noya nicacaiso marè' inapopi. “Quisocriso corosèquè chminatón, anoyacancantèrinpoa'. Inasáchin nicha'èrinpoa', topatèhua', cotio hua'ano'sa' aparisitarínènpoa',” topi. Ama inapitari no'huicaiso marè-huè' napopi. <sup>13</sup>Co inapita tèranta' ya'ipi pènèntèrinso' natèpirinahuè',

marca yaacotarínénquëma'. Niaco-tohuatama', pa'yatapi. "Ni'co'. Nisha piyapi'santa' natëténénpoa', marca niacotopi," tosapí. <sup>14</sup>Caso nipirinhuë' piyapi'sa' pa'yata'huaso' co yonquirahuë'. Quisocristo chiminínsoáchin yonquirahuë. Corosëquë chiminaton, anoyacancantërinpoa'. Ni'ton, inaro'co chiminahuëso pochin co ma'sha isoro'-paquë ya'huërinso' yonquirahuë'. Naporahuatón, isoro'paráchin pa'yatopisopita co huachi noya ni'ninacohuë'. <sup>15</sup>Marcaso' co onpopinchin yonquicaso' ya'huërinhuë'. Co ina marë' Yosë noya ni'ninpoahuë'. Quisocristo imapatëhua', nasha cancan quëtërinpoa'. Ina marë'

tëhuëncinso' noya ni'ninpoa'. <sup>16</sup>Nani no'tëquën a'chintëranquëma'. Ina imapatama', Yosë piyapínën chachin nisarama'. Yosë nosoroatënuëma', noya catahuainquëma'. Asanocancainquëma', ténahuë.

<sup>17</sup>Quisocristo no'tëquën natërahuë ni'ton, ahuërinaco. Ipora huanta pë'sharinaco ni'ton, cariro'sa' ya'huëarin. Napoaton ama insonta' aquëtë huarë' asëchincosohuë' ténahuë.

<sup>18</sup>Ya'ipinquëma', iyaro'sa', yonquiáranquëma'. Inaora nohuanton, Sinioro Quisocristo catahuainquëma'. Amen. Nani huachi.

*Paono*